

VACAS LACHIERAS

Rimadís azardós sus de causas 100% viscudas...

Ignòri tot de nòstra canavera
Mai vòli faire un expausat granat.
Donatz-me donc tota vòstra sciéncia :
Qu'es pas ieu de trabalhar !

A tu tanben, lei masets t'interèssan ?
Diga-me donc onte leis as trobats.
Leis anarai fixar ambe grand preissa :
E en cartetas mieunas lei vendrai !

Relèvas plen de citacions de plantas ?
Qu'aquò m'arreja per meis edicions !
Dona-me lei, farai la mesa en scèna :
Un universitari farà lo portisson !

Ai d'interès per ma toponimia
Mai sabi pas me ne despatolhar.
Rai ! vòu quistar a vòstra adreïça :
Mai dire mercé es pas dins mon estat.

Vòli crear una moneda locala
Ambe de noms d'aubres d'aicí.
Sabi pron ben vos demandar ajuda :
Mai sabi plus vos ne grandmercejar !

Trima per ieu pichòta man escura,
Ieu siáu gradat, ai donc totei lei drech.
Mai ton trabalh, que si que m'interèssa :
Trima per ieu, sauprai l'accaparar !

Vòli una òbra ben escannerizada,
A mon burèu faudrà me la portar.
Sabi ton mèl per demandar la causa :
Lo sabi plus un còp recepcionat !

Nautreï plaçats, mai sens grand coneissença,
Sabèm pas gaire dau lexic occitan.
Nos formaràs... mai sens la mendra paga :
Raja ton lach, que siás un referent !

Basa lexicala ? Ò fant que m'interèssa !
Dona-me la, conflarà mon afar.
Vòs pas donar ? Empachas donc la sciéncia ?
E que voudriás èstre en mai pagat ? !

Ai un projècte, mai pres a la garganta,
Lèu lèu te fau susar tei traduccions !
E sens molar que vau pèdre l'ajuda :
Per recompensa auràs un librilhon !

Autors, sachents, pres per de pissasciéncias,
Tractats pas mai que tropèus establats.
Servèm pasmens a far lusir sei plaças :
Nos tròbon encara pas pron encolardats !

Mai totei grands vertuós de senèstra,
Ferotges anti patrons, precaritat e CDD.
Per seis afars nadan dins l'impostura :
Prenon lei gens pas mai que sei varlets !

Totei pastats de paratge e larguesa ? !
Toteis onchats de nòbles sentiments ? !
Totei langastas a sautar sus la bèstia :
Viran l'esquina un còp lo sang suçat !